

ASSUSSENA REGALADA  
DE FINISSIMOS PRIMORES  
ALCANZADENOS FAVORES  
BARBARA VIRGINE SAGRADA

DE BABBU RICCU NASCHISTIS  
NOBILE MA INFIDELE  
SA SANTA FIDE ELEGGISTIS  
CASU PRO ISSE EST CRUDELE  
E ISTESIT TOSCU E FELE  
BIDINDEBOS BATTIZZADA  
ALCANZADENOS....

O DIVINA PROVVIDENZA  
DE SU VERBU SOBERANU  
DARE TANTA INTELLIGENZIA  
A FIZZA E UNU PAGANU  
PRO SU NOMEN CRISTIANU  
SES DE TOTTU ISPOLIADA  
ALCANZADENOS....

PRO CHI DE SUMMA BELLESA  
SA NATURA BOS DOTESIT  
BABBU OSTRU DE GRANDESA  
UNA TURRE FABBRICHESIT  
INIE BOS INSERRESIT  
PRO BOS TENNER RISERVADA  
ALCANZADENOS....

CUN SU PODDIGHE FORMESTIS  
IN SU MARMARU UNA RUGHE  
E RESTENDE IMPRESSA DESTIS  
A TOTTU SU MUNDU LUGHE  
PRO MEMORIA CUSSA RUGHE  
RESTAT OE VENERADA  
ALCANZADENOS....

BABBU OSTRU GIA' IRRITADU  
TANTU FORTE LU LEAIT  
A PILOS BOS HAT AFFERRADU  
TOTTU BOS ISTRASINAIT  
IN DOMO BOS INSERRAIT  
PRO CASTIGU IMPRESONADA  
ALCANZADENOS....

BIDINDEBOS IN PRESONE  
BOS ACCUSAIT A CORTE  
NENDE CUN FALSA RESONE  
CHI FISTIS DIGNA DE MORTE  
PRO CHI DE SA SANTA SORTE  
DE SANTOS FISTIS GIAMADA....  
ALCANZADENOS....

PRO NON CHERRERE ADORARE  
SOS DEOS ZEGOS E MUDOS  
CUMANDAN BOS ISTRAZZARE  
CUN DUROS FERROS AGUDOS  
SOS COSTAZZOS SACROS NUDOS  
E A PRESONE TORRADA  
ALCANZADENOS... . . .

IN\_FIANCOS E COSTADOS  
BOS PONZESINT FOGU ARDENTE  
BOS TAGLIESINT SOS MALVAROS  
SU PETTUS SEVERAMENTE  
E I SA TESTA CRUDELMENTE  
CUN MARTIGLIOS MARTIGLIADA  
ALCANZADENOS....

BABBU OSTRU INFURIADU  
BOS SERVESIT DE BUZZINU  
RAJU DE CHELU FALADU  
LU BRUJESIT A CHISINU  
PRO CHI SU COLLU DIVINU  
BOS TAGLIESIT CUN S'ISPADA  
ALCANZADENOS....

IN SU CELESTIALE PORTU  
BASSU DE CUSSA CORTINA  
A SOS CHI BOS FAGHEN VOTU  
ALCANZADELIS MEIGHINA  
CUN CUSS'ABBA CRISTALLINA  
NOVAMENTE PUBBLICADA  
ALCANZADENOS....

CUN CUSS'ABBA MEIGHINOSA  
CH'AZZIS IN SA DOMO BOSTRA  
A SOS MALES PROFETTOSA  
CHI ACCUDINT TOTTU APPOSTA  
VIRGINE AVVOCADA NOSTRA  
VIRGINE SANTA AVVOCADA  
ALCANZADENOS....

VIRGINE MIRACULOSA  
RICCA DE CELESTES DONOS  
DE DANNOS, LAMPOS E TRONOS  
LIBERADENOS PIEDOSA  
PROTETTORA PODEROSA  
CANDO SEZIS INVOCADA  
ALCANZADENOS....